



Na osnovu člana 18. i 55. Statuta Općine Maglaj („Službene novine Općine Maglaj“, broj: 8/07, 3/08 i 6/08), člana 9. Poslovnika o radu Općinskog vijeća Maglaj („Službene novine Općine Maglaj“, broj: 2/13- prečišćen tekst), člana 29. i 30. Odluke o izvršavanju Budžeta/Proračuna Općine Maglaj za 2019. godinu, broj: 02-05-1-2886/18 od 27.12.2018. godine („Službene novine Općine Maglaj“, broj: 10/18), Općinsko vijeće Maglaj na svojoj redovnoj sjednici održanoj dana _____ 2019. godine, donosi

ODLUKU
o visini i načinu isplate naknada općinskim vijećnicima,
predsjedavajućeg, zamjenika predsjedavajućeg /dopredsjedavajućeg i
naknada članovima Komisija Općinskog vijeća

Član 1.

Ovom Odlukom utvrđuje se visina i način isplate naknade za obavljanje vijećničke funkcije, funkcije predsjednika klubova, visina i način naknade za obavljanje funkcije predsjedavajućeg, zamjenika predsjedavajućeg/dopredsjedavajućeg (u daljem tekstu izabranih zvaničnika). Odlukom se također utvrđuje iznos naknade za prisustvo i učešće u radu Komisija općinskog vijeća kao stalnih radnih tijela.

Član 2.

Pod naknadama iz člana 1. ove Odluke podrazumijevaju se :

- a) mjesečna naknada vijećnika (paušal)
- b) naknada vijećnicima za prisustvo sjednicama Općinskog vijeća.
- c) naknada članovima komisija za prisustvo i učešće u radu komisija Općinskog vijeća

Član 3.

Izabrani zvaničnici imaju pravo na stalno mjesečno primanje (paušal).

Naknada za obavljanje funkcije izabranih zvaničnika Općinskog vijeća utvrđuje se u mjesečnom paušalnom iznosu od :

- 200,00 KM za vijećnike Općinskog vijeća
- 250,00 KM za predsjednike klubova vijećnika
- 500,00 KM za predsjedavajućeg OV
- 400,00 KM za zamjenika predsjedavajućeg /dopredsjedavajućeg OV

Član 4.

Naknada izabranim zvaničnicima za prisustvo sjednicama Općinskog vijeća iznosi 100,00 KM po održanoj sjednici.

Ukoliko se sjednica Općinskog vijeća prekine izabranim zvaničnicima za nastavak sjednice pripada naknada u visini od 50% od naknade iz prethodnog stava.

Ako nastavak sjednice traje duže od 3 sata istim pripada naknada u iznosu iz stava 1. ovog člana.

Član 5.

Utvrđuje se naknada članovima Komisije za prisustvo i učešće u radu Komisija Općinskog vijeća kao stalnih radnih tijela (u daljem tekstu kao stalnih radnih tijela Komisija), tako da visina naknade za prisustvo i učešće u radu Komisije po sjednici iznosi :

- za članove 30,00 KM
- za predsjednika 40,00 KM

Isplata novčane naknade za obavljanje dužnosti člana radnog tijela Općinskog vijeća utvrđuje se temeljem evidencija o održanim sjednicama.

Evidenciju iz prethodnog stava vodi nadležna Služba, a na osnovu odredbi Poslovnika o radu Općinskog vijeća Maglaj.

Neopravdano prisustvo sjednicama smatra se svako neprisustvovanje sjednici koje nije najavljeno i obrazloženo razlozima neprisustvovanja i koja nisu verifikovana na sjednici Vijeća. Neopravdano prisustvovanje sjednici Općinskog vijeća smatra se i ako vijećnik bez opravdanog razloga ne prisustvuje sjednici Općinskog vijeća duže od 50% efektivnog trajanja određene sjednice OV.

Član 6.

Isplata naknade iz člana 3. ove Odluke vršit će se do 5-og u mjesecu za prethodni mjesec .

Isplata naknade iz člana 4. Odluke vršit će se na osnovu evidencije o prisustvu vijećnika radu sjednice Općinskog vijeća, a naknada iz člana 5. isplaćivat će se periodično na osnovu evidencije izvještaja o prisustvu članova sjednicama Komisija.

Evidenciju o prisustvu članova sjednicama Komisija vodit će stručno, odnosno tehničko lice koje opslužuje radno tijelo.

Član 7.

Za realizaciju ove Odluke zadužuje se Općinski načelnik i Služba za privredu, finansije/ financije i razvoj poduzetništva i Služba općinskog načelnika i općinskog vijeća.

Član 8.

Izrazi koji se koriste u ovoj Odluci a imaju rodno značenje koriste se neutralno i odnose se jednako na muški i ženski spol.

Član 9.

Danom stupanju na snagu ove Odluke prestaje da važi Odluka o visini i načinu isplate naknade za obavljanje vijećničke funkcije, predsjedavajućeg, zamjenika predsjedavajućeg /dopredsjedavajućeg i učešća u radu Komisija Općinskog vijeća broj; 02-05-1-2939/17 od 28.12. 2017.godine.

Član 10.

Ova Odluka će se primjenjivati od 01.01.2019.godine i biti će objavljena u «Službenim novinama Općine Maglaj»

O b r a z l o ž e n j e

PRAVNI OSNOV

Pravni osnov za donošenje ove Odluke sadržan je u Statutu Općine Maglaj i Poslovniku o radu Općine Maglaj. Članom 55. Statuta Općine Maglaj, («Službene novine Općine Maglaj», broj: 8/07,3/08 i 6/08) utvrđeno je da vijećnik ima pravo na naknadu za rad u Vijeću i druga prava za vrijeme vršenja funkcije vijećnika, a da članovi stalnih radnih tijela imaju pravo na naknadu za rad u tim tijelima.

Član 9. Poslovnika o radu Općinskog vijeća Maglaj („Službene novine Općine Maglaj“, broj: 2/13- prečišćen tekst), odnosi se na naknadu za vršenje dužnosti vijećnika, odnosno vijećnik ima pravo na naknadu za rad u vijeću, kao i druga prava u skladu sa Statutom Općine Maglaj.

Član 29. Odluke o izvršavanju Budžeta/Proračuna za 2019.godinu odnosi se na «Naknade općinskim vijećnicima», a član 30. na «Naknade članovima komisije Općinskog vijeća i Općinskog načelnika», odnosno način korištenja sredstava sa navedenih pozicija vršit će se na osnovu Odluke, koje donosi Općinsko vijeće.

RAZLOZI DONOŠENJA

Razlozi donošenja ove Odluke leže u činjenici da je Općinsko vijeće usvojilo Budžet Općine Maglaj za 2019.godinu, gdje su predviđena sredstva za naknade za obavljanje vijećničke funkcije, predsjedavajućeg i dopredsjedavajućeg, kao i naknade za članstvo i rad u komisijama Općinskog vijeća kao stalnim radnim tijelima.

FINANSIJSKA SREDSTVA

Predviđena sredstva za realizaciju ove Odluke obuhvaćena su planom Budžeta Općine Maglaj za 2019.godinu.

Obradivač:

Emina Hasanić, dipl.pravnik

